

四庫全書

集部

欽定四庫全書

桐江續集卷三十四

元方回撰

序

天原發微前序

天有原乎曰有太極是也太極果何物乎曰無物也太極判有天有地有人有萬物皆物也獨太極則非物也物器也有道焉物氣也有理焉物形質也有命焉有性焉有心焉囿乎器成乎氣凝乎形質而為物則有象有

數有色有聲有臭有味有長短大小重輕多少皆顯者  
也有微者焉合顯微而一貫之則得之矣是故言器不  
言道言氣不言理言形質不言命性心滑於土直為小  
伎不知天者也乃若言道而遺器言理而舍氣言性命  
心而外形質淪於空虛為異端亦不知天者也吾友鮑  
景翔述聖賢格言著天原發微其知天者歟且周子所  
謂無極而太極者何也此之謂道此之謂理上帝以此  
降衷之謂命庶類以此秉彝之謂性人得此以為喜怒

哀樂未發之中之謂心總其原而言之則謂之太極欲  
求所謂極之太者而不可得也則謂之無極萬有粲然  
畢具而無端倪無方所無兆朕朱子所謂造化之樞紐  
品彙之根柢以為非物而實則為物之祖以為無物而  
未嘗不行乎有物之中學者知此則知天之原矣景翔  
取程子語發之名之曰冲漠微乎哉此知天第一義也  
由冲漠有二氣故

闕

者以一

元對待流行之氣兼言之也動而生陽靜而生陰太極

非能動也動者氣也氣亦非始於動也動前有靜莫知其端以其動者先言之元為四德之首也所以聖人體元出庶物外之著見者也曰靜動者以一歲流行之氣專言之也剝復之間有坤卦四時有冬一日有夜非謂有靜無動也靜為動體貞為四德之幹也所以聖人主靜立人極內之存養者也其次曰辨方者北方也陰終子半陽始子半在書朔易在玄罔冥故正固二義龜蛇象之曰玄渾者天形也天之外不可知也天之內皆氣

也天包地體而氣貫之海地為底流至無地則天氣吸水一涸無迹以日行地底消之也曰分二者陰陽也曰衍五者水火木金土也缺一不可二氣五行無極二五妙合真精淮南大戴日火外景金水內景道家者流謂金水潛光收視返聽以養其生謂日有食火有滅不欲外明先儒非之當明而明為離晉當晦而晦為明夷天不可廢日火異端乃欲廢日與火可乎曰觀象者日月星辰也太陽日太陰月少陽星而少陰無象天之十二

次天壤也七八九六有變不變寒暑晦明無乎不在舉其大者言之也曰天樞者北辰也北辰無星在北極星內一度有半至宋人始知之斗杓所建以正四時故謂之辰曰歲會者邵子經世書也以一歲十二月推一元十二會氣北而南則治氣南而北則亂疫癘藥療旱潦貯儲輔相裁成又在乎人曰司氣者七十二候曰卦氣者六日七分月更六候出大小戴四卦配四時六十卦配三百六十五日四分日之一出於焦京知天之一端

也曰盈縮者攷氣盈朔虛以置閏也曰象數者河圖八卦洛書九疇也曰先後者伏羲易先天也文王周公易後天也孔子兼先後天傳易者也天未然而我先之天已然而我後之先後之義也曰左右者天左旋七曜右轉也南面而觀易之初畫其字為一即有左有右有中再畫為二交二為十即又有上有下有中以一為圈置十於內則天圓地方左東右西前南後北上午下子六合虛而包地四維實而承天河洛先天五圖皆然曰二



中者天數五居中地數六居中圖書一居五中人居天地中心居人中即三聖授受之中也曰陽復者復卦七日來復也曰復者若失之而再得之喜之也自午至子為七以日代月為日聖人於姤不言崇陽也隔中孚一卦六日七分卦氣之說亦巧矣姑存之若夫數原鬼神變化三篇景翔猶未輕繕寫其大綱莫要於易莫備於闕洛以來諸老所言矣幸卒成之以惠後學昔朱子嘗欲為大爾雅而近世有為性理字義者未若此知天之

原而能發其微也雖然體用一原顯微無間言天而滑  
於小伎則裨竈梓慎洛下閎鮮于妄人耿壽昌巫咸甘  
石之徒皆能之言天而淪於異端則老子之道生一有  
生於無列子莊子之太始太素太初王輔嗣之寂然至  
無孔穎達之不生而物自生與夫釋氏之無形本寂寥  
皆誕也天道之與器也天理之與氣也天命天性天心  
之與形質也未始相離屈伸消息幽明死生之故初非  
二致一以貫之可也而所以貫之如何其惟敬之謂乎

敬則誠誠則一立坤二之直方至乾二之閑存誠之通  
動為先元而貞動此敬也誠之復靜為先貞而元靜此  
敬也自太極析而言之心性命理道合而言之道而已  
一太極而已無媿於太極之所以與我者敬而已敬之  
至誠而已探原發微致知也始事也窮原造微力行也  
終事也吾儕不可不勉也景翔名雲龍與予同邑而長  
一歲今年六十有六寶祐戊午鄉貢進士其書二十五  
篇擬天數二十有五云

天原發微後序

知其然不知其所以然可乎其然如何形而下者也其所以然如何形而上者也蒼蒼天也孔子曰知我者其天乎孟子曰知其性則知天矣此亦蒼蒼者非歟天有形有象有氣有數有萬物皆形而下者也藝精術專讀多見博或知之形而上者一言以蔽之曰道析而言之天理天命天性天心天則天德天威天討在圖為圖在書為書在易為易在範為範不測謂神不息謂誠何謂

元亨利貞何謂剛健中正巫祝醫卜知乎哉江之南紫陽山之北黃山之下有隱君子魯齋鮑公精於易學無書不讀妙年冠計偕選年七十一長回一歲與回兄弟交終其身客于同里廣西道儒學副提舉敬齋鄭公之家師友相得貲之著書其書曰天原發微五卷二十五篇天果有原乎曰有即所謂形而上之道也漢儒曰道之大原出於天如此則是先有天而後有道原本也宜當曰道者天之原而天之形象氣數萬物道之末也器

也公之書首太極陰陽未生先有此道故孔子曰太極  
我求太極其實無物故周子曰無極陰陽既生道在陰  
陽既有天地道在天地既有萬物道在萬物故朱子曰  
一物各具一太極次二曰動靜次三曰靜動人皆知對  
待流行之動靜而不知天與聖人主靜實為動之君動  
靜自元起靜動自貞起也後二篇明造化之鬼神非老  
釋之鬼神述造化之變化及學問之變化皆有功斯道  
往聖先賢前作後述搜玄獵冥參以已見天原之微備

矣是書也往復難問將十年敬齋梓其書行世回宿諾  
魯齋以序文序文成以今年十一月十七日南至而魯  
齋前十日以疾不起家僅有一孫嗚呼痛哉牖下尚有  
一卷未刻敬齋為竟其事回聞之輒增書魯齋生謝本  
末囑敬齋改刻併就書敬齋樂善尚義之美能盡師友  
之義而回所書亦庶乎不負兄弟之義云魯齋名雲龍  
字景翔敬齋名昭祖字孔明與回皆古歙州歙縣人元  
貞丙申十二月里友弟方回萬里序

河洛言敬序

古書之可攷者神農本草專言藥物後世如素問難經  
醫藥之書皆出此堯典專言天文後世如歷法百中經  
天文之書皆出此舜典專言命官周禮六官唐六典及  
後世官制之書皆出此禹貢專言地理後世如水經寰  
宇記地理之書皆出此至于孔門贊易專言吉凶刪詩  
專言情性定書專言治亂作春秋專言功罪賞罰禮樂  
散亡詩為樂之一而漢儒有禮記樂記曾子門人專以



孝為經司馬遷八書班固十志劉向之傳列女楊雄之  
記方言皆後世類書之祖也伊川程氏教學者將聖賢  
言仁處類聚體認南軒張氏始類聚洙泗言仁為一書  
易曰方以類聚唐歐陽詢撰藝文類聚是也楊敬仲乃  
謂言仁未有論語孟子時無可類聚類聚體認無非意  
路陸子靜至謂伏羲時無堯文章堯舜時無周禮樂未  
有孔子已前未有人言仁殊不知孔子之杞而得夏時  
之宋而得坤乾韓宣子適魯見易象春秋季扎聘魯觀

周樂自有文字以來古天子諸侯之國皆有先王之典章類聚言仁為學之至切要者也何至執私見立異論以攻之老子操槌提絕滅之心欲剖斗折衡莊子因之為筌蹄糟粕之論實開呂政李斯焚書之端彼拈花面壁乃至無有言語文字西域之教漸於中國忘君背父呵佛罵祖掇拾老莊之緒餘大不敬而甚不仁異端之為吾道患也久矣眉山楊君清父謂洙泗言仁由仁入聖河洛言敬由敬入誠非禮勿視聽言動敬也敬則

仁矣故曰克己復禮為仁洙泗言仁有功萬世河洛言敬有功聖門故亦類聚程子之言敬者其目六其條七十以開後學與南軒類聚言仁之書相表裏今夫世之類書七絲之琴一先之奕九章之算五采之績射評印格姓纂諡號酒經茶錄金石香具筆墨紙硯花果竹筍莫不有譜有訣農有齊民要術工有營造法式兵有七書經武要畧刑有刑統律令格式急就章博古圖實賓錄初學記兎園策府記室新書御覽元龜及太平廣記

之小說歷代會要諸家詩話皆不可廢昌黎痛闢二氏而道家之偽度人經釋子之一大藏終不可遏宋再傳集天下妄談陰陽星命之人流配沙門島止存易筮而秤星撥沙鮮鶚遁甲等經及近人繆著五行精紀三辰通載猶行於世惟是音切偏傍之韻篆隸行草之帖爾雅廣雅埤雅翼雅之類物宜選粹文鑑觀瀾層瀾崇古正宗之類詞章乃書生所不可少其大者近世晦庵朱氏以平生之力輯為四書又有儀禮經傳集解二陳禮書

樂書北溪陳氏字義東萊呂氏同晦庵述近思錄又有  
讀詩記西山真氏之讀書記鶴山魏氏之十六家易集  
義九經要義八十五類義理完制度備得其精微可為  
大儒次亦不失為該洽之士然言仁言敬則尤為希聖  
之捷徑也彼欲一掃而空之者傳禪鉢而煽秦火哀哉  
清父名汲前朝大理寺丞典郡先尊公平舟先生嘗參  
大政其亦如張魏公之有子云

汪虞卿鳴求小集序

造道以知道為先大學曰致知在格物物格而後知至知至而後意誠世儒或於此乎疑之謂為扞格外物如止遏情欲云者中人所能而於知道乎何關格者窮而至之之謂物者事中有理之謂也物格則知至非有上下截之分也格物而能窮其理則知道矣知是道也而意始可誠道之不知而曰吾意已誠可以造道者妄也東西之不知而欲趨都邑雖以誠趨之不至也酸鹹之不知而欲調滋味雖以誠調之不和也藥有良有毒不

知而以誠服之者舟有完有漏不知而以誠乘之者皆將有不測之憂是故必先知而後誠知謂知道誠則所以行是知而造道也顏子有不善未嘗不知道也孟子知言知性知天皆知道也夫然後服膺允蹈有所施其力近世陸子靜專指乎心精神情之發見者以為學則近乎從事於氣而不根於性本源涵養似有虧欠一超直入流為釋氏其於道知之而未至者歟陳同父高談漢唐取其一二近似偶合者以為帝王事業雜霸之

念橫乎胷中其於道知其偏不知其全者歟葉正則不以荀子性惡為非以曾子嘗有邊豆司存之言謂終不悟一貫之旨識見舛刺雖其雕章刻句足以自異一時而於知道蔑如也又有下於斯者劉潛夫以晚唐詩自鳴誘壞江湖小生絺繪浮靡曾不少涉乎濂洛之溪趨向邪僻以禪之南北宗方朱陸氏欲併糞其書則於斯道謂全無所知可也踵弊承訛至於今斯極矣異端雜流謏聞小技固有平生竭口耳之用彈筆墨之精卒於



聖賢分劑無絲髮所得豈不甚可痛哉予里人汪君逢  
辰虞卿早厭科舉之學研究義理著述幾近百篇摘一  
二為鳴求小集取嚶其鳴矣求其友聲之義以折衷於  
當世之君子如父在觀志父沒觀行取朱文公集中前  
說以為父之志而捨集註後說三年無改有感於元祐  
紹聖之變謂非道即宜速改予謂先儒解經有二說者  
有三說者詩三百思無邪朱文公謂作詩者不皆無邪  
觀詩者當無邪呂成公則謂作詩之人無邪觀詩之人

亦當無邪或又謂已刪之詩有邪思者因秦火而復亂  
經疑之似此者不一在學者體認決擇歸於至當虞卿  
能如此考經而致其知可也陳平六奇計偽遊雲夢之  
策虞卿深謂其非予謂何必陳平如張良啗秦將以利  
伺其怠即進兵許項羽東歸尋勸高祖追擊信義何有  
蕭何發子弟從軍賤買田宅自污君臣之間一切以術  
韓信築壇之拜其說甚偉至其戰攻不過拔幟囊沙出  
於詭數至欲為正而先請假王三人號人傑俱用詐謀

不以為恥何況他人虞卿能如此觀史而致其知可也  
造道之要莫先於知道知道之要莫急於格物格物之  
要莫切於讀書今人之學與古學殊惟有讀書以致知  
是為格物必先知乎書之所謂道知顏子之所謂不善  
知孟子之所謂言所謂性所謂天上而經史下而子集  
辨析毫釐探討源委而後篤實以充之剛健以進之始  
於不自欺終於無妄而極於至誠悠久不息之地則困  
知學知生知一也出處知時窮達知命語默知幾賢否

知人原始反終知死生精氣遊魂知鬼神無所不知亦無所不誠皆知道之極而已謂予不然則豈無同聲以應其鳴者

送順昌張童子序

易繫曰陰陽不測之謂神童子而謂之神豈陰陽不測之謂乎又曰利用出入民咸用之之謂神童子之謂神豈利用出入之謂乎孟子曰聖而不可知之謂神童子之謂神豈聖而不可知之謂乎曰非是之謂也一字而

數義一名而數意深淺高下差殊不同兩漢稱濟南終童江夏黃童至唐書劉晏始稱神童而宋史於晏殊亦以神童稱之通鑑外紀稱神農氏神而化之童子之神非炎帝之神也惟黃帝本紀稱生而神靈弱而能言索隱註謂子未七旬曰弱未合能言之時而黃帝能言所以為神異矣然則宜借索隱註神異二字以目童子之神可乎劉晏晏殊以八歲能文號為神童亦異童之謂耳今南劔順昌張昇年十餘歲背誦九經賦五言絕句

亦豈可不謂之異童乎讀陳無已集送邢居實序引論  
語闕黨童子昌黎集張童子二事則知突而弁兮學不  
止於童而已矣古人之學體必有用故曰體用一原顯  
微無間近世不然本末首尾乖離舛決向上之學理不  
貫事事不根理裂而為二最下之學詩不能文文不工  
詩裂而為二記問有餘踐履不足裂而為二甚者昧蒙  
養之大本逞蠱幹之小才脩身治人裂而為二童子其  
亦知之否歟是豈可不以前輩大老為師而講之歟耳

聰目明知之易神疲精竭行之難知行雙進求大畧小是歟非歟予之言多僭也而有益於童子之終身忽之歟抑取之歟

筭先天後天易詩序

易文言乾九五之大人先天而先弗違後天而奉天時紫陽山叟斷之曰我欲如之天從之先天天弗違未來之天也天已如此我從之後天奉天時已往之天也易有太極一章以天與聖人雙言之未分先後上天之道

聖人之心皆有太極生兩儀一陰一陽生四象陽陰為  
春夏秋冬生八卦上天之道乾兌離震巽坎艮坤聖人  
之心健順動靜陷麗止說為中正仁義未可謂天與聖  
人有先後也幽贊於神明而生蓍此一句言先天天弗  
違參天兩地而倚數此一句言後天奉天時或謂制器  
十三卦伏羲之時未有網罟已有離未有書契已有坎  
先天易也天垂象見吉凶聖人象之河出圖洛出書聖  
人則之後天易也堯歷象閏定四時先天易乎率尾東



作希革秋成後天易乎舜璿璣玉衡齊七政先天易乎  
二月東巡八月西守後天易乎孔子其或繼周百世可  
知先天易乎天何言哉予欲無言後天易乎康節邵先  
生神交乎伏羲之易著皇極經世書用加一倍法圖轉  
宇宙曰先天學其運行不已光明無窮變化叵測代謝  
弗替之妙貫已往未來之天於掌握嘗教人云堯之時  
先天也堯之後後天也後天乃倣法耳謙復歐陽君子  
文善推人命以予之生辰流年立先天後天大象小象

卦以評之議論可喜七十八老翁久無求於世君之術自成一家則深敬之不敢忽云


送仇仁近溧陽州教序

昔之仕也難於仕而易於達今之仕也易於仕而其達也則難何謂難於仕而易於達天下三年一試秋闈數百人取一人三年一試春官百人取六人餘有待補太學生外舍內舍與春官取中人同到殿殿試前三名謂之狀元榜眼探花而釋褐兩優上舍恩例視殿試第二

三名凡三年賜綠袍不過五六百人耳入仕何其難也然廟堂有知己則為臺官為諫官為文字官為左右司檢正官今日侍從明日樞參以至宰相甚易易而不難今之仕也何謂易於仕而難於達學校之士自縣教諭為山長學正一任即可入路府州教授以入流路府州縣諸司存吏以年勞為吏都目提控考滿則外省咨內省以入選軍功隨軍此不必論似乎入仕之甚易但自縣尹而上以至總管則極不易得內之六部集賢翰林

紫樞黃閣未有敢垂涎之者吾友山村居士仇君遠仁  
近受溧陽州教年五十八矣歸附垂

闕



桐江續集卷三十四

欽定四庫全書

集部

桐江續集卷三十五

六

詳校官中書臣孫溶

主事臣呂雲棟覆勘

總校官庶吉士臣倉聖脉

校對官助教臣胡子襄

謄錄監生臣李標

欽定四庫全書

桐江續集卷三十五

元方回撰

記

江南浙西道肅政廉訪司題名記

至元二十八年春更化夏諸道提刑按察司更名曰肅政廉訪司肅政者唐御史臺之別名也天下三大有司莫重於中書省莫重於樞密院尤莫重於御史臺省以總國政院以治兵政而臺有廉訪司分領諸道特隆其

名曰肅政則凡天下之為政者皆當於此改視易聽肅然而後可也夫廉訪司本一道風憲之寄而以唐之臺名冠之可謂重矣自檢之謂廉泛謀之謂訪則又合二義而加重其名焉攷典故而立名易振風采而責實難前乎是提綱刑獄者牽制於柄國之人時則官可慎取矣罪可慎免矣廉訪之職可舉矣肅其心而後政可肅廉其身而後人可訪此名實之說也司置使二人副二人僉事四人以分司一員監臨各路三十年春正月



中奉大夫大使東平徐公嘗任中司參大政自吳門移治于杭以總各路分司之政書司官姓名于石後之覽者將因名以求其實云

太平路修學記

學也者所以養天下士之地士也者所賴以共治天下之人天下士養於其地而地有所未稱可乎此其責在有司共治天下將有賴於其人而人或有所未稱又可乎此則非專於有司之責為士者不可不自盡其責也

當塗學冠江左乃逍遙潘先生之故寓殷序周庠豈如  
他官宇可就且賢者坐是傾圯穿漏踰十餘禩前總管  
何公瑋嘗率先作興今總管辛公仲實總同陳公特立  
總判梁公棟皆篤意脩復會至元辛卯冬予友朱君葵  
為博士竭力起廢肅政廉訪僉事昔班敷勉勸成提學  
李公浩檄用學廩而晚者猶以官宇為疑梁公首為移  
文辨析郡上之宣閩省府刊誤籍而後癸巳夏秋僞工  
竣事禮殿祀廡論堂肄舍內庭外門先賢之祠小學之

序俎豆什器帑庖湍罔一不舉楹桶戶牖朱丹黝堊  
上蔽下甃塗墍煥飾庀役十有五旬公給私助縻楮幣  
緡五千米石百五十既而總府宣差公獨爾迷失自省  
還任尊經閣之後曰復禮堂者又撤而新之士之養於  
此地者亦可少塞有司之責矣士之責宜如何學舊齋  
四郡先達陳公鉞更名其一曰致知行臺治書侍御史  
李公處巽篆其扁性無有不善學不可無師故中庸有  
率性脩道之目學莫患於知不至而意徒誠故大學欲

先致知而後誠意生而知之學而知之見而知之聞而知之皆知道也而知道之端不一易繫仰觀俯察知幽明原始反終知死生精氣遊魂知鬼神之情狀吾夫子知損益知百世又欲知命知禮知言孟子知性知天又自謂曰我知言皆知道之謂也天地之間物有則事有理必知先儒所謂攷察求索於其然究其所以然窮其根造其源由粗會精因顯悟微悠久積累融液貫通是非邪正窮達進退了然於胸中而後可以誠意行其所

知否則小技以為巧異端以為高黑白薰蕕混殽雜揉  
知不至而意徒誠猶之不知路而以誠趨之必迷不知  
藥而以誠餌之必危是故致知以知道如郭之有關閭  
之有闕越此關闕可為賢人可為聖人共治天下將有  
賴於斯人扼此一界限而不能度不名為人士不可不  
自盡其責者此而已矣雖然行而不知罔也知而不行  
惰也無罔無惰始之終之事也敬也者又所以貫乎始  
終者也博士上饒人與予講此熟矣新養士之地而新

其所養之人此新民平天下之道也有司學士宜交盡其責焉

釣臺書院清風堂記

清風堂者桐廬郡釣臺書院之講堂也凡郡縣學講堂曰明倫者多矣而此獨曰清風者何也孟子曰伯夷聖之清者也又曰聞伯夷之風者頑夫廉懦夫有立志子陵先生其庶乎伯夷之清風者乎伯夷父孤竹君武王父西伯子陵西都老儒光武南陽宗室均北面事人者

也故等夷耳商無紂武王不得有天下太公望焉得而封於齊周公旦焉得而封於魯漢無莽光武不得有天下鄧禹可平世文學掾區區侯霸而可三公乎萬乘之主秉其時權也一介之士守其志經也伯夷寧殺身以成仁欲明萬世君臣之倫者也子陵不屈道以伸身欲明萬世朋友之倫者也一為龍逢比干一為巢父許由無以時易志無以權廢經望旦裂土禹霸秉鈞心有所不安則不為之而豈有意於清其風以聳動乎天下後

世之觀聽者哉首陽之山富春之瀨清風不殊萬世永  
賴皆所以明人倫也初作堂為是名者前郡守趙與歷  
捐私帑重建堂者郡人山長駱正大方文豹而前郡守  
方回為之記

徽州路修學記

盡其力以興學易盡其心以講學難土木宮室之學學  
之地在人力性命道德之學學之天在人心盡其力於  
學之地者猶幸而有其人而盡其心於學之天者常患



於無其人也今庠序遍天下至聖文宣王冕十二旒服  
十二章大成殿納陛十二門戟二十四侑食從祀爵公  
侯伯近世加以治鑑史經世數二賢又加以周二程張  
朱文公張宣公呂成公七大儒師有寢生有館書有閣  
膳有庖此土木宮室之學天下之所同也獨徽學先聖  
殿之左又專為吾徽國太師文公祠異乎天下之學何  
也文公邦人也回枌榆晚出諸生俾記學之所以垂弊  
復興者運逢因繼踪為營屯論堂肄舍以革以鼎而疊

洗俎豆三獻分獻之區廟之東西廡內屏外闔仰穿俯  
蕪久矣今則一旦塑像繪新礮斲密荆榛剡丹雘侈塗  
平楹直如砥如矢總管府使君真定侍其公同朝愛民  
而禮士盡主維之力鎮守府使君廣平成公弼整軍而  
禮士盡贊成之力教授鮑君壽孫與正錄而下發廩割  
俸裒貲醵材盡經營之力仲夏鳩工季秋竣事殿之右  
再創周二程張祠增祠廣漢東萊吾文公舊祠名藻加  
嚴雖然此學之地也垂弊復興盡其力也性命道德之

學學之天諸生亦嘗講聞否乎吾徽學專祠吾文公豈私於鄉先生乎自羲畫以來有孔顏曾思孟之言不可無周二程張之言吾文公陟衡嶽沿婺渚參攷互訂無一書無論著由吾文公之言上達於周二程張之言又上達於孔顏曾思孟之言心學也吾文公於中庸首章具言之此心未發人所不睹已亦不睹人所不聞已亦不聞以敬存養而非寂滅之靜于以涵位育之全體此心既發人所不睹已則獨睹人所不聞已則獨聞以敬

省察而無過差之動于以充位育之極功所賦之命所受之性所由之道所得之德粹美不雜渾完無虧學者於斯而不盡其心可乎乃歌曰刻我石學之地我既我力肅爾衿學之天爾既爾心

潤學重修大成殿記

堯舜以執中之學傳後聖夏商周三代宗其道享國垂二千年孔子以求仁之學傳後人漢唐宋三代宗其道享國亦踰千年天之相斯文也既生孔子於前以集先

聖之大成又生朱子於後以集諸儒之大成故學之大  
成殿祀孔子為先聖從祀之廡增三十四人至朱子而  
止然孔子之後踰百年復得孟子而異端闢今朱子之  
後亦將百年未有可以從祀大成者繼之也則吾道之  
無傳豈不甚可憂哉宣城昌君士氣分教潤學四年而  
僅一稔適

闕

寬書下學廩出入勿會計以其羸修

凡學事遂修大成殿始壬辰仲夏訖仲秋貽書紫陽方回請記  
謂南渡學燼於火始創中緝終繕者程公邁劉公子羽

吳公潛力也又自書工若財之數以為佛老之宮布天下搜瓌究竒郡國不過一孔廟耳而坐視頽圯回竊謂今瞿聃之徒外熾內微政不足與之較也夫不以吾道之無傳為憂而以宮廟之劣於二氏可恥將競其文不競其實乎學堯舜者必自孔子學孔子者必自朱子孔子之四勿即精一之傳仁之全體也朱子以為心之德愛之理當理而無私心則仁在是矣是故鬪穀於菟之忠陳須無之清皆不得為仁二子之行迹也未知其心

果出於天理之公歟抑人欲之私也所以由求赤之事  
功而皆未以仁許之世固有所立甚偉而心不仁者仁  
矣而日月至焉或在或亡亦終不與傳道之科然則孔  
子集先聖之大成顏克曾省思修孟養得其傳以氣論  
性之學箋傳註疏之學論譏詞章之學少醇多疵失其  
傳惟周二程張再得其傳而朱子翼以張呂集諸儒之  
大成傳至於此亦盛矣庠序飾而燈火微方冊具而弦  
歌絕小慧立異邪見生疑吾凜乎懼斯道之再失其傳

也噫堯舜之中孔子之仁有人心則有道心古今一也而敢以無傳少來拾哉鄒書兩無有之歎歷千四百年而濂洛興揉氣質變習俗至魯至道躋世太平將以是望天下士不特潤之士為然也是役也廉司總府主維甚力代官徐君碩至之七日同告厥成其勿替引之至元二十九年九月初一日記

重建成信侯殿記

託孤之難未若立孤之難也幼而長之蒙而訓之宗祏



危而安之託孤固難死而生之滅而興之血食絕而續之立孤尤難周成王十三踐祚姬旦攝政四國流言七年而復子明辟此所謂幼而長之蒙而訓之以安其宗祏之危難矣哉夏羿浞之變后緡方娠自竇而逃一成旅遺臣靡立少康不失舊物此所謂死而生之滅而興之以續夫血食之絕不亦難之尤難者乎是故漢霍光擁佑昭帝可以謂之託孤矣保養幼主功為大不如丙吉張賀之有恩於宣帝始可謂之立孤垂死而生幾

滅而興德為大今廣平府故洛州肥鄉縣春秋時立趙  
孤近世封成信侯諱嬰之里也周簡王之三年晉景公  
時屠岸賈攻殺趙同趙括趙氏盡矣而趙武者趙朔之  
庶子也侯與公孫杵臼匿而藏之後祈奚韓厥言於景  
公復立趙武史記晉趙世家春秋內外傳劉道原通鑑  
外紀所書不同然成季之勲宣孟之忠若一髮懸千鈞  
迄至于有社稷不墮厥緒者誰之力歟肥鄉之程侯也  
則肥鄉之人祀之又豈止一鄉一國之善士歟侯之廟

在南方甚盛曰祚德封爵不止於此而肥鄉如故南北異也侯之後世居肥鄉程君玉欲新侯廟不果蔣君思為玉養子繼父志一新之宮殿四楹肸飾完美元貞初元季秋鳩工朞年落成用中統楮幣為錢百五十萬有奇其里人省郎王君英為求記而金玉總管府副總管姚君文龍省宣使程君起宗俾予書之夫食人之祿存亡繼絕忠臣也程侯宜書為人之後肯乃堂穫孝子也蔣君思亦宜牽聯得書是為記

四峯堂記

天地人之道易而已矣易變也有變有不變有易有不  
易不易不變其體也不容不易不容不變其用也以變  
訓易易難知而變不難見也天道陰陽陰變陽陽變陰  
地道柔剛剛變柔柔變剛人道仁義仁變義義變仁故  
曰易變也而曰有變有不變有易有不變何也天圓而  
動北極居北南極居南斗以杓指四時二十八宿為  
日月五星之次舍萬古不易者也一晝一夜天行三百

六十五度四分度之一而又過一度為厯法者歲久必  
差寒燠雨暘旦暮而異福善禍淫若有物焉則天道之  
變易者也地靜而方九州四海五嶽四瀆一大塊為土  
濕為水燥為火堅為金石秀為草木萬古不易者也山  
有崩落川有移徙潮汐有盈虛土壤有肥瘠頑石出水  
大阜生雲倉廩梁棟始於茅甲鳥獸魚鼈孕育無窮則  
地道之變易者也於是天地之中有人焉君君臣臣父  
父子子長幼有次第匹偶有夫婦講習有朋友萬古不

易者也皇而帝王而霸忠質文異尚子丑寅殊時以瞽  
繇為父而有舜禹以堯舜為父而有朱均太公伐紂而  
夷齊非武王比干諫死而箕子微子歸周孔孟不得位  
顏平原貧盜跖橫行儀秦詭辯亭長取天下屠販侯王  
多欲雜霸苟且為治黨錮于東都老莊于晉佛于齊梁  
詞章于唐世異事殊千端萬狀君子於此內學外行斟酌  
寬嚴劑量損益語默屈伸進退出處將有為也隨時  
不同則人道之變易者也是故古之聖人作易預知天

下後世之變畫為八卦重為六十四卦析為三百八十  
四爻揲之以著一卦有六十三變而一不變始於伏羲  
中於文王周公終於孔子俾天下後世於是易也不占  
而靜則觀象玩辭可以窮理盡性占而動則觀變玩占  
可以避凶就吉嗚呼微笑易之說卦有曰天地定位山  
澤通氣雷風相薄水火不相射八卦相錯說者曰此伏  
羲卦位也又曰帝出乎震齊乎巽相見乎離致役乎坤  
說言乎兌戰乎乾勞乎坎成言乎艮說者曰此文王卦

位也伏羲之卦位以明夫天地大全之易也乾南坤北  
天上地下離東坎西日生月出艮兌震巽各據一隅不  
變也地天交泰水在火上既濟澤山咸風雷益交互相  
資則不容不變也味八卦相錯一語則知天地之全易  
變而有不變焉不變而有必變焉文王之卦位以明夫  
四方四隅四時之易專指地而言而天之氣行乎地中  
者也震離兌坎東西南北四方以指夫春夏秋冬之四  
仲也乾坤艮巽四隅以指夫四時季孟之交也四方四



隅不變四仲四孟四季則八卦流行為八節十二月二十四氣而後庶物備歲功成味出震成艮等語則又知地中有天之易變而有不變焉不變而有必變焉睦之分水王氏世宦達徽猷閣待制葆真先生諱昇以布衣受山陰陸公佃奏薦至從官深明易學逆知靖康陽九之厄所著易解寓以微言五世孫森林叟世其先業得辭變象占之四道林叟又築讀易之室三間據西北面東南乾坤艮巽四峯環於戶外因扁曰四峯堂然則此

文王易之四隅也小而言之入室之乾坤艮巽耳大而  
言之則西北乾晉西南坤蜀東北艮燕東南巽吳又大  
而言之則晉之西北皆乾蜀之西南皆坤燕之東北皆  
艮吳之東南皆巽地皆數萬里震兌離坎四正之位皆  
然天地至廣未可以小觀也然不于其形于其理則小  
可以知大林叟歸而求之四峯之突焉而起與四峯之  
間窪焉而平者八卦之位也不變者也以理求之則出  
齊見役說戰勞成春生而夏長秋收而冬藏少陽而老

陽少陰而老陰時變也氣變也吾之此生觀四時四氣之變不能百年少變壯壯變老歲八卦變而天地之功成吾齒髮屢變而猶不為聖賢之歸乎守道知命法易之不變者應事物察時義法易之不容不變者易之全體大用在吾胸中運之而已嗚呼微哉

叢書堂記

多藏書而不善讀雖萬卷吾以為不足善讀書而不多藏雖一卷吾以為有餘李繁之書萬卷者三書之多者

莫如也新若未觸見嗟當時為父家傳誕而不實則豈  
非多藏而不善讀者乎張良之書一卷而已書之少者  
莫如也儋秦燹項為帝王師功成身退漢庭一人則豈  
非善讀而不多藏者乎同郡友人黃君宣字仲宣卜築  
歙城之東山以叢書名其堂叢之為字始見於易其在  
韻書訓之曰聚乾卦之方以類聚萃卦之觀其所聚是  
也叢天下之書而聚之是謂藏書藏而不讀不如不藏  
讀而不精不如不讀前史所志藝文經籍一寒士之家

馬能效其萬分之一匡衡鑿鄰壁而讀猶有書也王充  
遊書肆而讀則併書無之是故多藏不如善讀按叢書  
之名本韓退之語然退之始遊京師所攜書止一束耳  
未見其為叢也其進學解自叙謂口不絕吟手不停披  
記事提要纂言鉤玄則讀書之法也沉浸醲郁含咀英  
華作為文章其書滿家則讀書之效也有所觝排攘斥  
則屈所當屈有所補苴張皇則伸所當伸旁有所搜則  
諸子百家之長遠有所紹則七聖一賢之說崇正黜邪

障頽繼絕昌黎所謂讀書如此漢唐以來一人學者仰之如泰山北斗書云書云徒叢云乎哉嗟乎聚必有散世之好聚帑庾財賄者往往有悔聚名畫聚法帖聚難得之書亦雅道之一癖近世衲子號曰叢林得其師一指禪用之不盡者吾聞其語矣未見其人也予雖老與吾仲宣尚皆勉之

野塘記

為王御史作

古之君子必素有可耕之資而後以其所負出而應乎

人天下國家之用合則進非謂缺於口體衣食之奉而  
饕餮其祿利也不合則退故雖屏居畎畝亦未嘗有飢寒  
憂乏之憂伊耕莘葛耕南陽三聘三顧而後起不輕就  
也使非有湯先主之遇亦退而耕耳顏淵貧未至都無  
可耕聖師不可為吾何為故終於不出陶元亮貧亦尚  
有可耕故嘗試一出知其不可為也而終於處後世之  
士苟有可耕如伊葛之得所從捨其耕如顏之不可出  
守其耕如陶之出而不可久返其耕無若彼蘇秦然徒

以無二頃田之故能取六國相印矣而不能退也嗚呼  
井田廢而孤寒之士生不能有一犁之土苟求而幸得  
啗餌而迷穿無亦惟是以一飯誤千金之軀痛哉行臺  
監察御史膠東王公庭弼邦直學者以野堂先生稱之  
今觀龔學古所繪圖乃野塘也御史嘗長均房帥幕十  
餘年而後入言路第見其廉於進取如此不知其家有  
良田在沂水之上野塘與田接壤其廬之堂有曰萬卷  
云者有曰歸老云者蓋其志欲退休而讀其所藏之書



良以素有可耕之資可以仕亦可以無仕不專以仕為  
急也紫陽方回久與御史同官新定偉其意題其圖為  
之歌曰野塘之水兮其色油油以畜以泄兮灌我良疇  
弋有鳬鴈兮盟有鷗我出而仕兮可則進脫如不可兮  
還我鋤耰水之上兮山之下稷黍棗栗兮野塘之塢秋  
收其實兮於粢滿筐車既膏兮馬不前退而家食兮孰  
予敢侮我思野塘兮繫古之沂有懷其人兮瑟聲希可  
由求亦兮賢寧不希登之廊肆兮佩玉黼黻否則豈無

春服兮詠雩風而與歸

止所記

金華吳君功甫分教鹽官與吾宗方君韶卿同里相遇  
武林邂逅談詠知功甫讀書之室曰止所因共紬繹止  
之所止之義止之時而回次叙其文記之詩止於思無  
邪禮止於毋不敬大學之道在止於至善故君臣父子  
各有當止之所然有止之義焉有止之時焉義者心之  
理當止而止則一武不可過一毫不可及此心之規

矩準繩也時者身之位當止而止進退去就視可否而立則酌輕重而制中於是心之理著而為應事接物之權衡是故聖人於易曰艮其止止其所也斯言也兼心之理與身之位言之乾兌離震巽坎艮坤錯綜上下一卦有六十四爻凡卦之二而遇六為柔得位而中凡卦之上為過高無位而多悔吝離震以柔爻居二者八不皆吉也獨艮之居二八爻皆吉足以敵坤遯用黃牛咸不隨腓旅之得小過之退漸之磐謙之鳴純吉無瑕如

蹇之匪躬重艮之不拯又有忠臣直士正義不謀利之志山立屹如此其故何也承剛順君也履柔納下也身之所處當位而得中也此出仕之臣得位者之艮止也吾功甫是也六十四爻之上乾猶戒亢惟四爻吉坤猶憂戰惟二爻吉獨艮爻在上處乎事物之外以止為體無求無競大畜之天衢損之得臣賁之白賁頤之由頤蠱之不事剝之不食蒙之擊蒙重艮之敦艮八爻無不吉者此致仕之臣去位者之艮止也不肖回是也然則

一定不易心之理止之義其邦畿千里維民所止之止乎萬變不同身之位止之時其孔子仕止久速之止乎內不爽於心之理外常察乎身之位各當其所止所哉所哉止之時義大矣哉

普同塔記

人自其一身以至一髮一毛皆中虛而外實包天而肖地其體四其骸百其臟五其腑六其竅九其脈十有二其俞穴大谷小谿三百六十有五無不虛貫實而實輔

虛虛為天之流行實為地之凝結總言之心之虛最靈為清為明為神為聖位乎身之中而身之實者以其重厚沉濁之質囿於其外天虛地實相依附而生虛者還天實者還地厥初之妙合者相離焉則死古辟王作深察夫死生之際智不去惡力不全愛實中之虛根理成性吾與庶民同乎此受者既已還為天之太虛虛外之實孕氣成形雖要其終必還為地之積土而非假以久遠則猶弊而未腐毀而未泯由是制為邱壟掩埋之法

安厝封樹各私其私此人道之終事也世季俗奪或不  
皆然錢塘故大都會承平時城東西郊日焚三百喪有  
奇月計之萬歲計之十二萬畝一金而歲欲十二萬穴  
勢不可故率以火化為常宴笑佚遊朝居華屋疾病奄  
忽暮界烈炬孰不痛怛於斯一旦有出乎意表者又大  
不然吳芮遠孫貌驚有似樊崇暴黨事極報烝其為痛  
怛抑又甚焉則與其不忍於凌陂之歌曾未若儕之綿  
上之融風也三茅寧壽觀道士三山劉祖華其亦悟夫

理性形氣之虛實人我不殊捐私泉易地十畝於西湖之赤山為石塔曰普同之塔高廣深各丈有二尺界乎其內納凡既燎者之骨其徒居左餘衆居右惟革除鼎布以來胥嗣於其所先配儼於其所偶興僕於其所事交朋於其所知蓋有訃而莫臨暴而弗殮者不止蔗節瓜犀之感獨此之得其所託獲霜寒食之酌若表南陽之阡豈不亦仁人之所為哉雖然虛還天以廟饗實還地以墓藏禮也厚藏為過不墓為不及浮圖之梵而茶



毗之歸自釋氏始本非中夏之令典自老氏者亦不得已折而從之予自孔氏又為之文悲夫祖華儒而隱於黃冠求予文者其從父汝鈞予詩友予為紫陽方回塔成之年至元丁亥五月二十六日記

### 聖泉亭記

泉何以名聖龍為之龍何以能聖泉為之夫人之所知也而惡知夫氣脈之有會聚歟而又惡知夫精神之有感通歟建德縣卜君元英為令尹六歲矣歲告稔惟玄

默敦牂之六月不雨七月戊午朔郡遍走羣望壬戌之  
夕令尹偕尉王濟陟烏龍山民遙見陰蘿幽嶂間炬火  
魚貫上鳥道縈折星明螢滅至明旦乃始知長吏躬迎  
聖泉得古禱應上公之遺意有志乎民而然也又明旦  
甲子大雨雨始盛令尹適與前太守方回遇言夜半至  
山龍所居泉所潄狀而未以雨為足也既而尉送泉還  
山有片木出古湫之底取視則昔人所書聖泉二字亭  
腐而扁淪者令尹乃議復其舊而識之丁卯處暑癸未

白露而至再至三至四五民庶其無飢矣乎今夫泉成  
聖於龍龍養聖於泉崖沍不減川溢不增其處也德聖  
挹彼而雲注茲而霖其出也功聖龍以泉隱體而泉以  
龍顯用其相為聖也如此抑龍所以樂此泉匪山曷凝  
泉所以響此山匪人曷格山巍然甲一郡內坎外艮得  
蒙之聖氣深脈厚靈物憑焉人萬物之靈心之精神是  
謂聖信則感誠則通甘澤降焉求諸泉求諸龍又博求  
諸山而後知神宮與宅繇元造之所鍾然又必返求諸

人而後知山有泉泉有龍非此之靈足以交於彼之靈  
則所謂聖迹者將韜晦遁藏之不暇豈凡心之所能動  
哉嗚呼居漱不盜孺纓不濯廣以貪病永以愚惡吾無  
以議為矣漢然同流汎然側出不如吾之泉不忒其則  
溫泉冬湯冷泉夏雪不如吾之泉不變其節鹹泉熬鹽  
淡泉化鐵不如吾之泉可以澡三伏之烈酒泉致醉醴  
泉愈疾不如吾之泉可以豐百昌之實磊斯山兮泓斯  
泉昌為而聖龍所淵復舊亭兮識豐年後有禱者尚勉

旃以迹求聖良獨難惟人孔靈心即天

新修建德縣記

今建德府本漢丹陽吳郡之分地吳割富春縣置建德縣自黃武四年始時已割歙縣置新都郡縣猶隸吳都晉宋因之梁隸東陽郡隋廢唐復初置睦州嚴州睦治雉山在今淳安嚴治桐廬郡縣隸之自武德四年始七年嚴廢縣省後復為縣隸睦州自永淳二年始又其後徙睦州治建德自神功元年始歷錢氏及宋復號嚴州

而升州為府則又取縣名以媿之蓋縣先州而有府因縣而名可謂古縣也已縣故有唐進士張東所撰縣碑紹興中郡守董公弁重修縣志謂碑已不存庭中大櫨樛枝密蔭幾千載物賢令岑公象求有詩亦近三百載詩與樹今俱存也夫以甚古之縣其興廢不一矣書事之石當存而不之存其歷世之戰爭攘奪亦不一矣一木之種一詠之發意未必長存而乃相與俱存則今縣尹卜君之修營脩飾與予之紀識可以存可以無存皆

未可知也至元十四年歲在丁丑夏四月君視事軍南  
趨北還過城下未息市里戛戈鎧聲縣間宿止大將垣  
缺藩拔馬牛羊豕穿房序胥曹訟卷訊犴鞠械徙它所  
朽桷腐瓦卧草棘什五六君心經意緯圭穢植顛率屬  
勸毗乃大興役十七年十一月訖明年正月竣事予過  
其外重門眈然層樓翼然望其中靚深整嚴愈於曩俾  
司工者枚之以間計六十有八近民道愛清白三堂仍  
故扁存古也君法當更代者弗至先嘗考學宮矣復棟

是字是其用心所存抑又古也是可以傳遠無疑而不  
知予之文將如張碑之易泯乎或亦可如岑詩之與樹  
俱永乎勿剪勿拜存乎人心而予之所以託斯名也君  
名元英將仕郎董視簿邊君完將仕佐郎提總宣差君  
合刺進義校尉

務本堂記

古之民有四而士出於農治國以士為本富國以農為  
本工商亦國之所資末矣而非其本也後世於四民之



外奇衰謫觚惚恍謬悠加以佛老之徒而六捨本逐末  
者爭趨之今夫通都鉅邑或數萬戶無弦誦聲兒女子  
不識耒耜機杼為何物怪優異倡彈絲吹竹蒼頭廬兒  
連駟列騎灑削鼎食馬醫擊鐘肆侈齊姜僅多印卓空  
青丹砂象齒翠羽縹緗犀珠璧玉綺繡眩麗耀珍誇貴  
崇賄田畷生而罔識與褐之父睨之乃若萬緇千黃鉛  
墀珠宇匪織匪犁解衣精饌果報談三身敷落演五天  
求福田利益覬羽化超昇其淺者梵唄魚螺符呪鉛汞

奔走王侯脫徭遁賦飭材者竭藝通財者傾帑錢鏹露  
塗蘼鹽酸冷則亦剝祝簪戴從之苟以飫朽養慵是孰  
使之然哉雖然此特吾南方近歲之所見爾中原風俗  
殆不其然濟南古郡天下耕桑詩書務本處也章邱之  
翟氏昆季三人長居正定甫次居禮節甫次居中道甫  
高昭曾穆畎畝膏腴師矩友規燈火方冊上奉二親下  
教諸子惟本是務農以耕桑為本而勤儉又耕桑之本  
士以詩書為本而孝弟又詩書之本此其一心一身一

家之本則然要其極宗廟邑都非士不治粢盛倉廩非  
農不富豈止一家之本而已哉乃國於天地一世之大  
本也今六合一貫幸遭逢宗本抑末之明時務本者可  
以勸矣若夫錦川繡江之間嘉山秀而清泉潔美木茂  
而芳草馨濟南故多名士當能與四方之士大夫登堂  
而賦之他日有繪斯堂為圖見示者予亦或援筆焉元  
貞改元乙未歲在大火蒼龍心一度謹記

問道亭記

致知之學始於問問一事知一事問一物知一物以問  
為恥則容有一事一物之不知天下萬事萬物不勝其  
多也欲枚而問之不亦難乎道一而已矣貫乎事物是  
故不如問道然問道尤難也非問道者之難也必有知  
道之人始可以答未知道者之問而世之知道者未之  
或見也古之知道之聖人至孔子而極易繫曰一陰一  
陽之謂道又曰形而上者謂之道形而下者謂之器臨  
川陸氏不信大傳以下一句排上一句謂陰陽非道乃

形而下者永嘉葉氏不信大傳略不詳上一句謂道者  
陽而不陰之謂一陰一陽非所以謂道此二人於文意  
尚有未通焉得知道惟明道程氏曰一陰一陽之謂道  
道非陰陽也所以一陰一陽者道也如一闔一闢謂之  
變吾新安朱氏縷析此語謂陰陽是氣不是道所以為  
陰陽者道也一陰又一陽循環不已乃道也故說卦有  
曰聖人作易立天之道曰陰與陽立地之道曰柔與剛  
立人之道曰仁與義天以氣言地以質言人以理言其

曰與者三陰而又陽陽而又陰柔剛仁義亦然猶一闔一闢之說也此其所以為道也子思曰率性之謂道人與物皆得天命之性率是善性斯之謂道由於氣而汨其性人所以有愚人偏於氣而戾其性物所以有惡物子思之言尤精孟子曰夫道若大路然可行之謂通衢斯之謂道不可行為旁蹊則非道矣孟子之言亦精昌黎韓氏先言仁義然後言由是仁義而之焉之謂道道也者行仁義而已斯言亦當前聖後賢言各有指體用

康該本末一貫乃如老氏所謂有物混成先天地生言  
體而不及用其謂失道而後德架虛鑿空非吾所謂道  
也釋氏之徒言有物無形認心為性併本體而失之其  
謂六道輪迴肆誕騁罔非吾所謂道也嗚呼斯道也知  
之而以脩己教人為聖賢不知而日用之為百姓無所  
知而妄言之謬行之為異端休邑趙君彌忠隱居樂道  
藏息之所有曰醒心者有曰風雩者有曰翠侍者所從  
入之途築一亭曰問道意有所欲造步不可不進行欲

有所適取不可不審此所以有道之問歟答之者誰歟  
問鑄金得鑄人問足所涉之道而悟心所求之道僕雖  
晚學敢不誦所聞發之

徐氏道悅堂記

君子之道一而有不同焉非道有二也論道之與行道  
不同也今夫勸人以農隴桑畎麻植採紡績如是而溫  
澤稻陸粟耕耨歛穫如是而飽實竭此力則實享此奉  
非徒欲誘之而為是說也至如農之為農筐筥機杼耒



耜錢鎛凡衣食之源非不舉室終歲效勤致瘁而溫飽者百不二三然亦卒無所歸咎而不敢赅其園蕪其田弗復藝蒔此其故何也勸人以農論道者也論道者原其常農之為農行道者也行道者通其變昔者子思子論誠孟子申之以教夫子之居下位者信於友獲乎上以治其民終事也明乎善誠其身以悅其親始事也此猶勸人以農兼脩為效驗而言之為人子而知此道則不當有一毫為利之心處焉而家盡其在我出焉而官

盡其在人置身於規矩準繩之中養老於溫清定省之際此已之所當為離騷之歌黨錮之傳叔季接迹持閨門之行而覲朋好之游談千鄉黨之譽而想軒墀之步武苟萌此義則世之是非黑白未可知也譬之農豈惟兩暘不昏時若有豐歉之異抑亦賦役獄訟出於吏而所以梗夫農者其故萬端農之道非不盡而飢顛寒踣者比比此固非農之罪也而亦豈勸人以農者其說有所欺於我哉桐江徐子愚以前上舍教授上饒而歸

嫡母太夫人許氏年八十有一名其戲綵之所曰道悅  
予於是設為農說以記之熙寧中黃魯直教授北都七  
年陳無己元祐中連為徐潁州教授當是時有子愚家  
仲車先生者舉進士不仕後起家教授山陽三鉅公皆  
嘗以冷官奉母黨論興正途塞卒皆不居公卿之位豈  
非良農之水旱者乎子愚名晞顏年踰知命有八男子  
家不為貧季路米茅容雞顧易具也是穠是蓂將必有  
吹噓而上之天者

桐江續集卷三十五

欽定四庫全書

桐江續集卷三十六

元方回撰

記

孚舟亭記

亭以舟名亭之肖乎舟者也舟以孚名易兌下巽上之卦曰中孚也兌為澤凡天下之水皆是也巽為風為木水上風行而木浮焉乘舟之象也以二體觀二五剛得中而實以全體觀三四柔居中而虛卦之六畫亦舟之

象也然則何以謂之中孚孚者信也誠也中孚者由中之誠信也巽居上以誠信順乎下兌居下以誠信說乎上相孚之義也易有畫則有象有理則有義象則舟而義則孚也孚之為字上從爪下從子兼有象羽禽以足轉所卵而燠之如巽兌之相孚時至而啐殼出雛誠信之至也是卦也中虛者誠信之本也中實者誠信之質也莊子言虛舟而謂無心老子言車器宮室而謂當其無之之處為有用之處彼蓋不知虛實相維之道於吾

儒之易未始有聞也非實則何以為外輔非虛則何以為內容允以上之一畫巽以下之一畫合而成虛為舟之腹心巽以上之二畫允以下之二畫對而成實為舟之首尾上不以誠信順乎下則何以格下下不以誠信說乎上則何以從上象也巽順允說而彼此感應風動澤受而内外交際義也或問予之作是亭也將以玩春華延秋魄耳而樓夫易之孚舟以為名不已迂乎雖然予嘗為區區之衣食謀南浮沅湘北泛濟泗大河長江

洞庭彭蠡粵之海蜀之峽吳之震澤胥潮無不至焉當  
其急黑飈雪浪桅仆柁傾與垂涎摩牙之蛟龍爭一絲  
之命蓋瀆死者屢矣而每幸免是必猶有誠信一念可  
質鬼神故未嘗無險難而卒無患未嘗無困乏而終無  
憂自今以往坐卧於浮舟之亭念念思之上法巽順下  
參兌說人以誠信感乎己己必以誠信應乎人已以誠  
信感乎人人亦當以誠信應乎己此觀象玩辭之事不  
敢不勉若夫揲著諏筮而成小過之卦六爻皆變者則



當以此卦驗諸身而玩其占焉世有知易君子當以予言為然

建德府兜率寺興復記

佛法入中國以來僧吾齊民寺吾勝壤日以益夥吾未易數計然其法不過析而為三有禪僧有律僧有講僧故其寺亦三曰禪寺曰律寺曰教寺古兜率寺建於唐中宗時後為蒲鞋陳尊宿所居亦禪也而其徒或謗曰團寺問之則曰團者聚也敬天下之所同敬尊天下之

所同尊自斗食以上官若吏聚於斯未仕而為士已耄而為父老聚於斯與夫奔走百執事工伎倡優及凡祝髮者皆期而聚焉於斯蓋吾儒之說古聖人祿位名壽一本於德而佛者之說則謂佛之願力甚大人之精神無所不通隆棟邃宇蓮其座奉三大像如君辟之殿墀之下班列行分如羣下之會朝於焉虔祈莊禱是可以降休隲祉遂臣子葵藿之願當其效華封人之祝而舉嵩岳之呼豈不鞠躬跪息舞手蹈足扣額稽首以請振揚

梵唄鳴擊器用焚膏爇燭熏然馨香恪儼震肅日就天  
臨也是意也潦水澗毛尚可以羞神明徵福祥而況於  
報上之誠心乎良以正覺大慈天下之所同敬然據九  
五臣億兆天下之所同尊夫既敬所敬尊所尊而團其  
人則當極夫敬之尊之之事而重其地某昔至郡則所  
謂團寺者弊甚更一周星愈益圯剝攷故吾州尚書羅  
公汝楫舊記僅存夫殿像與二力士奮拳杵立於闕外  
而已餘悉草棘一旦有慧燈者及吾門則咤曰寺且復

矣曰何以復曰非燈能復之也復之者僧錄法濟也其所以能復之何一曰歸侵疆寺左右故地廣袤民奪為室廬今案籍如故藝桑麻粟芋蔬果可貨食屋其上猶有餘二曰集羣力郡僧三千人醵泉五百得百五十萬為倡檀施始源源而來三曰殖崇產歲租入舊無幾額之總統釋教所新益田為畝若干嗚呼正已往成見在慮將來敬尊尊備矣後之人忍墜之乎抑物莫不有數此寺紹興甲子羅公為郡更五年己巳而後守蘇易

簡興復之至元辛巳回去郡又五年丙戌而僧錄法濟興復之前後兩記皆歛人之嘗為守者歲月亦稍相似則又豈偶然也哉僧錄法濟張姓開封人佐之者僧判智顓羅姓江西人致力請田者前上饒教官徐君師顏舉慧燈者如川皆郡人楹礎若干數游者可觀此不書

琴書堂記

琴書堂者新安郡雲岫居士劉公伯誼燕休之所也娶予先君之第三姊勤勞起家眉壽偕老然其居三燎于

火淳祐元年辛丑大火琴書堂再造甚偉殖貨益饒有  
雙竹之祥予先叔父元圭和句特警拔居士大喜親書  
揭之景定元年庚申大火起于鄰堂自是不如前至咸  
淳六年庚午又大火則堂不能復矣居士長子文蔚先  
姑所出次庶子曰子申姑命為長子後當火之三子申  
年甫十五孤苦艱危不絕如髮歷十餘年始克自立琴  
一張書千餘卷屋數楹始復乃祖之舊與兄秉懿先嘗  
析居仍合為一孝友愉怡謹脩待定琴書堂復成室宇

園疇盡還舊觀居士暨先姑積德好善報在子孫天理之不可泯如此郡守康公天錫為書其顏屬予為記予謂古之琴有歌有弦今之琴弦則是矣而歌弗傳古之書且讀且編今之書以刻以摹動千萬篇今琴視古為太簡故操琴甚易聽琴者莫辨然今書視古為太多故著書甚易而業書者或莫之專於斯二者而得其意則琴固在徽軸之外而書亦不在紙軸之間玄之又玄盍求之天子子孫孫勿替其延是為記

潁南耕舍記

畢昴之分大梁之次古常山郡有潁水焉潁水之南風  
氣清淑土宇寬曠滹沱在其東井陘在其西上黨在其  
南燕代在其北昔人百戰必爭之場而今也干橐射息  
有耕無戰真定趙侯卜築於斯號曰潁南耕舍介南徐  
韓炳求紫陽方回記之回謂三代之民四士農工賈耕  
者一而食之者三猶患不給後世之民七曰僧曰道曰  
軍皆不耕耕者一而食之者六故不給尤甚豈侯欲矯



是弊也而將以躬耕為事乎古之士蓋亦耕矣伊冀沮  
溺皆是也然不為老農仲尼垂訓並耕而食孟子闢之  
况夫班品穹崇勲閥殊異民庸昌大治最流聞有如侯  
者而可以一旦解簪紱親耒耜歸馬廐閑騎牛阡陌吾  
未之信也曰是不然士大夫患無此志有此志追廣受  
於東海從羊裘於嚴陵是不難耳陶元亮彭澤棄官耕  
於下潁其自賦嘗謂田家豈不苦弗獲辭此難劉凝之  
求田納祿耕於康廬題其像者謂身在菰蒲中名滿天

地間豈可謂今世無其人哉易用九戒剛而上九剛之過者也易乾上九為三十二上九之首故於此設亢悔之教以為例他卦上九惟艮居外體者八而皆吉以其止也履之其旋元吉以應柔也大有之吉無不利以乘柔也訟之三禱以至未濟之濡首以過剛失之者十有二卦而晉與益抑又甚焉求晉而不已則初登于天後入于地求益而不已則莫益之或擊之近世貴極人臣者眷未嘗不隆於上威未嘗不震於下而不測出於意

外豈非所謂知進而不知退者耶士大夫而知此則樂於道矣侯之耕舍可以歸歟不必需泥塗潦而後謂之耕也涼風至而稼穡茂夕日下而牛羊歸予未得游於濱南故缺其賦詠而姑為是記云侯名瑗同知高郵路總管府事弟名璫同知浙東道宣慰司事故相門皆名卿

建德府南山寺旃檀林記

佛氏善效其說與儒者或不能不同而其徒與士大夫

風俗亦未始大相異易之理難明也乃以龍喻乾以馬  
喻坤於一物取一象而易可推聖人之德難言也故孔  
子以天喻堯子貢孟子以日月宮牆泰山河海麒麟鳳  
凰喻孔子而聖人可知旁行之書非六經語孟比也於  
其種嗣根器之偉者以龍喻以象喻以獅子喻以芟芻  
摩尼喻以薝蔔優鉢曇花喻其聚僧之所曰選佛其為  
之侍者而處於將僧未僧之間則曰選僧而又侈其勝  
曰旃檀林亦猶國家用人用將相大臣於已官者未官

者也於士乎取士登一名謂之擢桂故取士之地世謂  
桂林釋氏之法異於儒而其取人之說合乎吾儒之說  
者如此古睦南山禪寺自無竭禪師如川主之陶虛鑄  
空新具聚僧之所簷宇靚崇屨鉢昌庶予為文以記猶  
懼其離於有相也既予歸紫陽山下龍集癸未再以書  
求記所謂旃檀林者按圖故礎為數六十露庭風牖篁  
砌柏廂凡將僧未僧之衆與夫亞於座席而各執佛之  
事者飢饉垢浣炎浴涼爐纖舉悉備且不惟是丈室舒

嘯有寄傲之穹閣為棟三給薪買鄰山為頃半擇水作  
石堤為丈百浚塘溉新粳闢園蒔豆麥庄農佃叟戶加  
室增實首捐私泉十二萬而後檀者踵至或謂斯皆有  
相之所為而出於好名者之所不能自禦然予嘗謂近  
世士大夫貪惡廉進惡退緘默惡直諫阿黨惡至公則  
詆曰是皆好名世道以是潦倒泥腐今釋氏之法盛行  
而乘以射利者無所能亦無所畏視事如監司守令馬  
前後呵殿有騶從案牘有胥吏笞撻有卒徒兇酗號食淫

不啻跼蹐顧視吾川獨勇於為善則箝制之以為好名亦近世不肖士大夫妬貪之術耳嗚呼均是人也能言之類一也則其說釋與儒烏得而獨異雖曰均是人也在智下愚殊超也中人以上中人以下不侔品也則釋之徒與士大夫風俗焉得而不同然則說與儒者合吾見一川矣曾不能變其徒之風俗將有如近世士大夫之弊則予未見百川也是旃檀林中必有讀吾文而興感於斯

善應庵記

予所居縣曰歙渡紫陽山下溪西南五十里曰航口其地隱僻其人古直孫居士復興家焉其近鄉有為尉於信之貴溪者曰吳君雷孫其子曰謹於杭袖書過予言孫居士尋與書皆來書曰居士幼甚貧事母黃氏孝母歿誓終身廬墓積儉累勤買田十畝築室十間田以供築盛屋以祀其先時延道友飯之繪世所謂觀世音者奉之大人尉貴溪之日為請於三十六代天師張真人



宗演書善應庵三字扁之僻隱之地輪蹄隔絕古直之  
人中屢追隨竹樹茂密溪山奇勝請予記予謝曰耕疇  
居宇如是其眇也而可記古有廟祭無墓祭骨肉斃於  
下陰為野土之死而致生之不智也故不祭於墓其氣  
發揚於上為昭明焄蒿悽愴之生而致死之不仁也故  
祭於廟其祭也薦血腥之禮燔燎羶薌以求諸天報氣  
也饋食之禮黍稷肺心醴酒以求諸地報魄也反始用  
情謂之二禮故有陽厭有陰厭於廟不於墓而孝子之

心盡矣且祭必用尸周之東而廢尸而用主今之禮無一而古重墓祭而輕廟祭卜尸迎尸惜莫之曉以紙若水書其先之稱謂近於主稍飾則畫素肖形曰影堂又過是則凡鬼神無不刻梓冶金為像而其事侈矣子貢廬孔子墓三年而去後世有以終身廬先墓廢廟不祀為孝者皆非古也居士即墓為庵若混乎廟墓之祭為一為善而應理所必然事葱嶺之神而庵之命名書額乃出於陽平都功之教又似乎混佛老而為一者也若

之何為記曰不然墓祭漢以來尚矣墓有庵以歲時炆  
嘗猶不失古意今之祭然香明燭藝幣非報氣乎酹酒  
瘞牲非報魄乎祭不以血食而以菜茹則佛老之說俗  
不可鑄然易曰隨時兵興已來百頃千楹之家頃刻羽  
化惟佛老之徒得全祭者託於佛老而恣庸者依於佛  
老而苟中人藏其身於佛老之間亦可以粗安田里而  
無他虞居士好善於世無求方之奔競官路走趨公門  
顧財賄而不知止陷刑辟而不知悔者固有間矣他豈

無稱儒生而叛孔氏者惟口惟腹蝸戰蠅營視居士亦或愧焉且居士知方使君之名求文以壽斯庵此一節亦不可不書也是為記

肅齋記

昔河南程氏繼孔孟絕學教學者求道入德曰敬既為之訓曰主一之謂敬又為之訓曰無適之謂一學者能至於主一而無適乃敬之極功初學之士或難之至紫陽朱氏集註論語第一篇之第五章本程氏說亦曰敬

者主一無適之謂至為敬齋箴而後有曰不貳以二不  
參以三則主一無適之義始明大抵心在乎此則不可  
又適乎彼方主乎此事則不可又雜乎他事此其義雖  
甚易知而未易行也全此敬於成熟之餘者固必能主  
一而無適持此敬於操存之初者如之何遽欲主一而  
無適哉朱氏晚節別為之訓曰敬之為義惟畏字足以  
盡之蓋有取於太公之丹書敬勝怠者吉子思之中庸  
戒慎乎其所不睹恐懼乎其所不聞怠則不畏不戒慎

則不畏不恐懼則不畏人於天地之間罔有所畏則蕩然自肆人欲恣而天理滅矣是故惟畏可以訓敬而初學者易以入門雖然猶未也朱氏之高弟曰勉齋黃氏又以肅訓敬引洪範之肅以明之謂肅亦畏字之意敬自內出則貌恭恭既外形則心愈肅故曰恭作肅而記禮者亦曰心肅則貌敬以畏狀敬而又以肅狀畏初學者所以防閑束縛之方不在茲乎今夫震擊雷霆談說神鬼聞者莫不肅然何也肅即畏也畏即敬也皆人心

之本體而因事以發見者也常人於此僅有斯須之肅  
斯須之畏斯須之敬君子則不然常如是肅常如是畏  
常如是敬靜則暗室屋漏儼然若思動則出門使民如  
臨賓祭善學者由肅入畏由畏入敬貫程氏朱氏黃氏  
三言而一之於求道入德亦可以弗畔矣夫真定石君  
郁文卿好學妙年從師以肅名其讀書之齋近俾予為  
記以析其義而予衷是說以復焉然則肅而畏畏而敬  
所以涵養其心而徒敬無事則流為異端故先儒教人

尤貴於致知求之於方冊而古人與俱如易之畜德求之於朋友而今人與迪如易之兌習則幾矣君年甫四十三嘗為湖北宣慰司上幕尹鹽官富陽二大邑皆有聲今將尹武岡以是肅為政其不有如時雨化之者乎

三勿齋記

心一而已而有人心道心之分有未發既發之分有忿懣恐懼好樂憂患之分有惻隱羞惡辭讓是非之分心豈若是其多端乎心統性情性靜情動聖人教人以養



心之法制其動之不善以全其靜之善不得分別言之也昔者孟子與公孫丑論不動心之道十有四問十有四荅其七問而七荅也有集義養氣之說雖養氣也實養心也心得其養則其氣浩然心失其養則其氣餒故曰志氣之帥也何謂心得其養孟子之十有四言盡之矣必有事焉而勿正心勿忘勿助長也有此一有勿此三勿則集義而義集矣養心在是而養氣亦在是矣西京趙氏河南程氏以心字屬下句臨川陸氏以心字

屬上句新安朱氏以為屬上屬下皆通必有事焉之事  
如有事顯史如昭事上帝如請事斯語如從事於斯必  
有云為必有措一舉一動無非義者此集義之綱也  
然是心也苟或毫髮覬望有所為而為之則不為義故  
設為勿正心之戒傳曰師出不正反戰不正勝孟子曰  
忠信不二非以正行也蓋懸探預期邀譽計功之謂此  
心既除然又恐其流於怠惰苟且荒唐繆悠而莫之救  
故又設為勿忘之戒忘也者不耘苗者也人之一心扶

左而右危起東而西仆勿忘可也過於勿忘而無以禦之或至於矯枉詐偽詭遇行險故又設為勿助長之戒助長也者握苗者也一勿利心也二勿放心也三勿戕賊之心也一勿不戒莊子鵲炙時夜之謂也二勿不戒釋氏槁木死灰之謂也三勿不戒截鶴續鳧割肉啗口愛子而衣裘裳延年而餌金石無益有害甚矣學者之於此心能體認孟子一有三勿之訓三綱正三目舉義為心主心為義主不淫不移不屈豈不所謂大丈夫者

哉膠西王君瑤德玉宦學江左講明心學有志有氣東  
嘉孔君文杓端卿以三勿名其齋屬予記之予敬誦所  
聞抑予謂味七問七荅之養氣又當味八問八荅之知  
言養氣者乾之剛知言者離之明剛孰有如天者乎明  
孰有如日者乎剛不挫於人明不惑於人儒者之能事  
畢矣

萬山軒記

干世者患出山之太早又一出而不復入也避世者患

入山之不深又一入而不復出也入而不出古有之今  
未之見也出而不入則於今多見之然則勇於避世者  
雖未敢盡以為賢急於干世者其賢否可知已士大夫  
非無用世之心出處有時進退有命當外觀內省而自  
謀之謝安石之在東山晉室安危繫焉一出而內難平  
外患弭然猶東山之志始末不渝海道一舟竟違雅志  
後世當途之士雖負大聲名未至如謝公之於國家決  
不可無則莫若常以邱壑泉石之念寘諸胷中可仕即

仕可隱即隱高唐陳侯忠正之才高而氣剛春秋五十  
有九官甫至郡貳嘗屑仕吾州愛其山而樂之以萬山  
名其軒所至揭焉侯之說以為入山不復出過於矯激  
出山不復入過於奔競皆吾所不為也時止時行山不  
在目而常在其心所謂每飯未嘗不在鉅鹿下也是心  
也孟晉迷復之失可以免矣若夫萬山云者非謂枚一  
十百千以至於萬也猶之萬人萬事萬物舉成數而言  
耳噫侯之宦游萬山之間去之久而不能忘愚家居萬

山之間非不欲老焉而未即歸其不有愧於侯之高風  
也是為記

豐山亭記

古歙大州也婺源大縣也汪氏大姓也迴嶺之下有豐  
山焉豐之為言大也州大縣大姓大山大宜必有大丈  
夫藏脩其間而友人汪君茂春令以文記其豐山之亭  
君之說曰媿歐暨蘇非建紹大詞臣乎吾家浮溪老大  
文章也嗣濂紹洛非乾淳大儒宗乎吾鄉晦庵翁大學

問也吾非不早負大志吾亦欲遠希大賢青衫初筮里  
社相鄰黃紙再除海壖于役弓刀警邏桴鼓徼巡既重  
之以簿領之勾稽又責之以弦歌之撫字慨一身之餘  
幾叢四職以并兼三千食客之封君八百家僮之巨室  
貫耳雕題之會蠻琛島賁之衝此是而彼非左恩而右  
怨多爭而少讓面譽而背疵勞心而勞力畏首而畏尾  
得情勿喜實繁望廷尉之徒知幾其神莫甚見督郵之  
恥大丈夫於此不遠復可也而可以迷復乎哉東阡西



陌吾其田上棟下宇吾其宅栽桃種李豈必河陽撫松  
採菊是亦柴桑蕙蘭無澧浦之悲橘柚非汎洲之貨菰  
蒲芰荷之沼鯉泳龜浮梨柿橡栗之林鹿呦猿嘯粵蕉  
岷芋渭竹庾梅后土洛陽之花神農雷公之藥唯力是  
視具體而微不豐於爵位而豐其甘旨以奉親不豐於  
泉布而豐其饌羞以娛客醜綠醕兮勞農耕野剔青燈  
兮聽子讀書此吾所以因山築亭有取於豐大之義蓋  
謂豐於天理則吾之大丈夫者非世俗豐於人欲以為

大者也吾觀於易離下震上明動相資所以致豐明而不晦動而不靜不可以保豐如日在天懼過乎中吾之仕將進而窮乎寧退而通乎同郡方回高其識壯其言神遊其亭為之謠曰識象外之意者可與言易豐之象傳可以象測物盛而大皆不可極天地日月與時消息酒飲微醉花看半開焉得深於理者與之歌觀物之吟於斯亭而和之以歸去來乎

有有堂記

天之所以昇於我者豈獨我有之人有之物亦有之豈  
獨聖人賢人有之雖愚不肖之小人亦有之中庸曰天  
命之謂性此專指天所賦而言曰率性之謂道此兼指  
人與物所得而言曰脩道之謂教此則專指聖賢之所  
以異於凡人庶物而言由夫天之所賦人與物之所得  
者觀之則天所與無不公人與物所受無不同故曰豈  
獨我有之人有之物亦有之豈獨聖人賢人有之雖愚  
不肖之小人亦有之如將由夫聖賢之所以異於凡人

庶物者觀之則情慾之累為桀紂蹠躠始有而不終有  
氣質之偏為禽魚草木僅有而不全有若聖與賢氣質  
清明情慾淨盡於是獨能有夫凡人庶物之不終有且  
不全有者也嗚呼性也道也固有之有也同有也至於  
脩以為教而性存道備則豈非保有之有而獨有者也  
此趙氏有有堂之所以作歟吾嘗患乎世俗之士素所  
固有失亡漸盡而無遺餘非所當有經營搜抉而不知  
紀極煽門戶之勢齟闕田疇之膏腴南金明珠美玉麗

錦以肆侈奢法書名畫古匱珍鼎以崇玩好戎鑽李核  
崇鬪萍蘂鍾乳三千胡椒八百殊不知此皆外物也暫  
聚者必忽散乍來者必倏去一旦莫之能守則煙消灰  
滅甚者骨且朽而名尚臭孰與夫秉彝物則固有此天  
保而有之黠鬼所不能瞞大盜所不能奪者哉孔子曰  
季氏富於周公又曰齊景公有馬千駟此世俗所謂有  
也孟子曰人皆有怵惕惻隱之心又曰大人者不失其  
赤子之心者也此吾黨君子所謂有也然則此趙氏有

有堂之所以作歟抑又聞亡而為有聖門以為戒有若無曾子以是美顏子趙氏名彌忠學甚博文甚奇而不自眩耀年與予皆將七十而能以謙下人予嘗為作問道亭記今又為記斯堂乾下離上卦曰大有有則有矣良賈深藏有而若無不亦善之善者也若夫有名萬物之母老氏之所謂有有物無形本寂寥釋氏之所謂有近理亂真皆不合於古聖賢之言實勿論可也

不老堂記

古今人情不甚相遠好之極愛之至則必有過美溢褒之辭古堯舜以上皆年百餘歲彭鏗年八百餘歲李耳年二百餘歲而後世謂上壽百二十謂七十者希然則詩所謂永錫難老俾爾昌熾俾爾耆艾萬有千歲眉壽無有害其無乃相與為欺歟曰不然君臣父子夫婦兄弟朋友之間下事上卑奉尊以其惻怛忠厚之心形為祝贊願望之語故詩六義有頌焉者此也易所謂原始反終精氣游魂則萬古不易之定理道德經曰物壯則

老又曰死而不亡者壽其言天地能長久非羽流所謂不死者也莊子非全書列子乃偽書亦皆言死生壽夭未嘗言世有不老不死之人至列仙傳黃庭經真誥等作始謂人可不老不死五代王建據蜀道士王喬者偽撰靈寶度人經以惑世始謂枯骨成人髮白再黑齒落復生龍漢開皇之年敷落鬱羅之天妄註繆釋謾誕詐諛缺世之愚人以鍾呂為不老不死而飛昇者饒之德興董君守成儒者也介其邑人李君重魁來亦儒者也



求予為不老堂記且謂蘇文忠公為董君毅夫隲括陶靖節歸去來為長短句者即其五世祖儒者也而以不老名堂則似乎捨儒而從老氏且陶蘇二詞曰神仙不可期曰神仙知在何處皆有寓形宇內之嘆斯堂也無乃遂以神仙為實有而欲學之乎曰非是之謂也昔朱文公以詩辭胡籍溪劉共父在朝之招有浮雲舒卷萬古青山之句胡五峯聞之疑其有體無用為賦青山不老出雲雨洗塵埃之句意蓋取諸此耳山體也雲用也

分二詩味之文公之意主乎處五峯之意勸以出合所謂萬古不老四言味之則體定而用殊山有不可變之色士大夫雖有可行之時終必有不可移之節此之所謂不老者山色不與時而少變也非彼數息服氣辟穀餌藥養內外丹煉陰陽神以求夫延年益算而不老者也董自號曉峯居士無復日五色夢以不老之娛自娛而亦不知老之將至取先生君子所云我今忘我兼忘世及一川風雨要人看者引壺觴自醉而浩歌焉亦足

以為一代之豪哉

棣華堂記

易之初畫一陽奇一陰偶為兩儀其再畫也為四象四象之上又畫焉老陽加奇而加偶老陰加偶而加奇少陽加奇而加偶少陰加偶而加奇是為乾兌離震巽坎艮坤而八卦成說者以乾坤為父母兌離震巽坎艮為六子而有長男中男少男長女中女少女之分由是言之盈天地之間父生母育凡圓頂方趾橫目而為人者

皆吾之兄弟也而況九族五服之內所謂兄弟者乎由  
曾高祖父以及已而至子孫曾仍雲來其沿無窮其初  
一人之身也猶之卦六十四出於八八出於四四出於  
二二出於一萬有不齊之初一而已矣君子知此之所  
謂一者則可與處兄弟之間矣杭新城之羅氏自襄陽  
徙由漢及唐末而諫議大夫給事中名隱字昭諫以風  
節詩章顯聞于時又十世生夢孫夢孫生勝祖勝祖生  
子二卯成文寶卯成生一子天錫文寶生三子應龍應

新應卿今四入生八新城祖業累世不分卯戌今年七十有六主其家事文寶嘗為別邸杭城往來憩息仕為迪功郎兩浙制準乙亥之變歸鎮鄉邑罄蓄儲賑隣里平生尚義嗜善樂施迨年五十七而卒應龍與予文字交謂家有堂曰棣華請予記其說於壁是詩也興而兼比或以為文武治內之雅或以為周公作則成王時或以為召穆公作則宣王時詩有作有述有頌古詩之先後不可必攷鄂不韡韡之義以況兄弟之上覆下承

則不可不講或謂鄂不二字當作萼附大抵以謂花與  
蒂之相附弟必順承其兄兄必蔭覆其弟安樂相輯睦  
患難相扶持不特大而有天下者當然小而有一家者  
亦莫不當然也雖然論其華萼不若論其本根植物之  
在地也何必棠棣根本固則華葉茂唐風有杕之杜曰  
其葉湑湑其葉蓁蓁亦所以興兄弟杕杜也棠棣也焉  
有不深培其本根而能責望其流行發見之茂盛者乎  
予嘗謂人生而皆有孝弟之心管蔡之失為一時私見

所蔽耳今之教子弟者不必人人皆為碩儒要當從師  
取友通古今識道理化氣質屏物慾使皆知乎萬物之  
所由生同乎一氣一家兄弟子孫之所以衆出乎一人  
之身則雖或纖微擊觸有乖離析異之萌亦自然有所  
不忍矣噫嘻此豈非務學讀書為根本之謂歟同田為  
富分貝為貧羅氏之後尚世永保之

輔德廟碑

祀天郊祀地社祀祖禰廟天地之神壇而不屋人之神

則屋之屋之則曰廟所以聚其氣以凝其神也周公明堂以文王配上帝天與人皆以廟祀之自此始古天子諸侯大夫士廟有差三代功臣與食太廟未有特以一夫而立廟者也蜀人德諸葛野祭猶不輕廟唐狄相使江南僅存夏禹吳泰伯季扎伍員廟自張許行節義廟睢陽韓柳以文章守廟潮柳由唐入宋多援此比而江南之廟大不勝其多有司不欲違人心而許之廟然以未命之士未壯之年一旦形亡氣存赫厥威靈奔走半



天下則莫若翊應助順正烈廣靈周侯廟祀之盛者也  
侯杭州新城縣人世家綠渚諱雄字仲偉母夫人感金  
蛇浴金盆之祥生於宋淳熙十五年戊申三月四日以  
嘉定四年辛未四月朝徽州婺源五顯王廟卒年二十  
四侯像方巾綠袍勁髯脩眉巨鼻聳目魁岸瑰碩或依  
憑或示現或託夢寐衆尊為神祈穀響應五顯王者其  
五方五行之英氣歟始以九月二十八日降神四月八  
日慶佛誕者走廟下無慮百萬衆侯之神實先後之端

平二年乙未饒州德興縣有請以侯辛卯歲於本縣祁  
門陰捍常山草寇旗甲金鼓恍惚雲際乃後所在疫而  
禱旱而禱雨而禱虎害火災而禱禱輒應始封翊應將  
軍嘉熙元年丁酉兩淮制置大使趙葵奏邊境清賴神  
力別封護國忠翊大將軍二年戊戌許新城縣照德興  
縣已封稱翊應將軍新舊廟又明年庚子縣令黥汪績  
為記淳祐四年甲辰徽州請加封為翊應侯寶祐二年  
甲寅下新城縣賜勅額曰輔德廟五年丁巳加封助順

為四字侯咸淳七年辛未加封正烈為六字侯十年甲戌加封廣靈為八字侯建炎舊制神祠靈應賜額封侯自二字至八字止侯自崛起亘古所罕有先是侯之猶子宗智者於開慶元年己未陳乞周氏子孫主廟事僧指南蠲潔葺修如婺源靈順廟式尚書符報可宗智竭貲再造斯廟穹殿傑閣亢爽高闊疲二十年之力獨門廡猶舊大元混一靡神不依中書右丞楊公鎮生長杭夢有感捐金成宗智志華締一新鳩工至元十六年己

卯抵癸未告成侯之孫逢吉介邑人羅應龍請回實錄  
其事回謂顏子二十九蚤死配饗宣聖德也鄧禹二十  
餘封侯為雲臺四七之首功也侯稟天地異氣享年僅  
踰弱冠而能以其方寸之不朽為五顯王丞弼與顏德  
鄧功比隆神矣哉侯卒之百一十三年大德庚子再改  
斯文碑之乃歌綠之渚三章歌之曰

綠之渚兮浣侯衣青厥蟾兮神所依未壯而逝兮匪天  
白首者拜兮莫之敢非潮來兮潮往侯朝出遊兮夜歸

侯昔家兮今廟奠椒醕兮神其我酌渺渺兮綠之渚子  
陵在上兮子胥下羊裘孔樂兮鷗夷猶怒勾吳炎漢兮  
俛仰今古侯之願兮天不違保我民兮靡兵靡饑水無  
蛟蜮兮山無貍豹有蘋有芷兮歲其報彭殤其盡兮孰  
盡而神不死者心兮幻者身雨八荒兮先我桑梓我刊  
此石兮百世之史

餘干州學記

大縣升州以民多也縣學升州學以士多也自元貞二

年丙申始饒之餘干既升州州學置教授一員自延平祝君宜孫始民多則戶口盛故州置守重其名以臨之士多則風俗美學置教授者亦所以重其名而以已之所知教乎人以已所聞授乎人乃風俗之所由關則其所任尤有所重而不輕者矣夫升與降為對而實宜副其名升州置守其名重於舊矣戶口有降而無升可乎此為民父母者之責也學置教授亦名重於舊矣風俗不升而或降可乎此為民師表者之責也此循名責實

者之議所以不容已也餘干風俗何如哉三代而下人物議論惟諸葛孔明張柬之范文正公韓忠獻公張忠定公趙忠定公有伊周之風明道似顏子伊川似孟子而南軒張宣公似明道晦庵朱文公似伊川張忠定公卒於是邦其臨戎有范文正之勞而不計孔明之利鈍趙忠定生於是邦其立君有韓忠獻之功而不幸乃有如柬之之冤死張忠定有子宣公如明道如顏子而嘗侍養於是邦趙忠定有友文公如伊川如孟子而嘗講

學於是邦此餘干風俗之所以盛也祝君為教授之明年大德改元丁酉夏具學事本末俾愚為記且其言曰縣升州匪以榮州官縣學升州學匪以榮學官名升則實當與之俱升州官當思所以養其民而升其戶口學官當思所以訓其民而升其風俗是邦也兩真相兩真儒無以加矣而又何升學者而欲遽為兩真相兩真儒未易及也階而升焉得為斯四大老之事業問學亦可矣然則將欲為四大老其又何階南溪柴公中之風



節嘉定去國外補痛詆權吏不屈雙峯饒公魯之性理  
石洞紀聞等書有功考亭不少此其階也學舊在琵琶  
洲厲揭良難紹興壬戌令杜師旦遷于羊角山之左租  
入歲石二百餘厄湖潦七八載祝君裕枵植仆戟門論  
堂齋廡先賢之祠小學之序一時改觀以至揭扁榜鑄  
祭器罔不一新逮秋冬又修宣聖廟楹棟瓦甍丹堊煥  
然州官六員賴張主扶持之力甚至爵位姓氏見題名  
記此不具書工費間架之數不枚書雖然餘干風俗甲

天下愚粗能言之矣山水登臨之美甲東南記不一言  
及之何歟曰樂山者見其靜樂水者見其動登所謂養  
正堂而懷前脩遨所謂筆峯亭而覽絕景劉長卿張祐  
錢希白楊大年之詩具在學者能之是亦餘事進於斯  
道則祝君當舉由求亦點言志之章相與訂之

桐江續集卷三十六